

Augsburg, 10. November 1566

An Johannes Oporinus

UB Basel, Fr. Gr. I 11, fol. 290r.
Steinmann Nr. 780.

S. Cum Nondinae vestrae instarent, subitò me frater meus secum in patriam, inde Norimbergam abduxit. Nec multò post redditum optatissimae tuae literae mihi sunt redditae, quibus et sententiam tuam prudenter exponis, et meae non aduersaris. Etsi autem neptis nuptiae, quam meis sumptibus elocare constitui, me non parum impedit: operam tamen dabo, vt proximis Nondinis Isocratem graecolatinum diligenter emendatum cum commentariolis meis accipias: quem tu acceptum arbitratu et iudicio tuo politissimo curabis, meqùe ea sollicitudine lenatum in Demosthene ad eundem modum laborare patieris. Etiam indices haud dubiè rectius à te quàm a me conficientur, cui labor hic capiendus fuit ea maximè de causa, ne in explicatione verborum eadem diuersis in locis inculcarentur. Decreui enim multa resecare, non fortassis inutilia per se, sed minus necessaria, posteaquam tam copiosa Lexica sunt edita. Nonni Dionysiaca Vtenhouius ipse ex Fuggerana Bibliotheca accepta perlustrauit, nec magni aestimauit recentis manus ἀπόγραφον. Sed si id vsui tibi fore tute existimaris, operam dabo, vt ad te mittatur, sed in primis opus erit te huc mittere syngrapham, qua testeris te intra certum tempus librum sartum tectum restituere velle: Cos. Hainzelius spondere pro te, vt opinor, non recusabit. Canthero decretum a Caesare honorarium et hoc missum, cui reddendum sit, quaeso vt signifies: qui vtinam versus εἰς θεοκράτορα, quem αὐτοκράτορα plerique intelligunt, non edidisset. Literae quas misisti, Viennam sunt curatae, et Viennenses vt isthic reddendas cures, oro. Vale. Augustae 10 Nouembbris 1566.

Hiero[nymus] Wolfius T[uus].